

四庫全書

集部

欽定四庫全書

柯山集卷十

宋 張耒 撰

七言古詩

有感三首

郁城本自貳師謀
騎士拔劍猶封侯
董生明經守正直
白首區區相侯國
參差世事足嗟歎
我笑羣兒較目前
可能董子之榮辱
乃在封侯得失間

羣兒鞭笞學官府
翁憐癡兒傍笑侮
翁出坐曹鞭復呵
賢于羣兒能幾何
兒曹相鞭以為戲
翁怒鞭人血流地
等為戲劇誰後先
我笑謂翁兒更賢

南風霏霏麥花落
豆田漠漠初垂角
山邊夜半一犁雨
田父高歌待收穫
雨多蕭蕭蠶簇寒
蠶婦低眉憂繭單
人生多求復多怨
天工供爾良獨難

題大蘇淨居寺

平生愛山如好德
未嘗一飯忘泉石
大蘇山下松栢林

路盡重門照金碧思公得道神所相指示巖幽駐鉶錫
天台妙教源欲啟來此一酌曹溪滴兩公道場守龍象
兵火暫晦終輝赫撞鐘伐鼓食千指皆二大士之餘力
縈紆石磴造山頂上有玉人方燕寂北軒三伏飛冰雪
一日掠盡淮山色東遊塵土我實倦道遇化城聊暫息
青鞵布襪舊家風此身終効名山役

客過

歲窮北風卷平楚張子畏寒深閉戶叩門過我者為誰

東帶出見亦良苦俛眉謂客子勿瞋我心善煩勿多語
天寒酒賤曷不飲安用造謁勤如許

謁客

入門投刺吏翩翩我非欲見禮則然異哉賓主兩無語
客起疾走如避然我已不恭愧昔賢忍使塗炭朝衣冠
人生暫聚鴻集川春風吹飛何後先

迎客

城門抱關皆老兵問客來早天未明我笑老翁勿嘲訕

我愧古人百千萬道傍赫赫翁所見寒熱郡國欺鄉縣
人之所畏敢不畏嗟我此翁安得慢

局中晝睡

鳥啼花開千萬思春色醉人成午睡燒香掃地一室間
藜牀布枕平生事君知章華久寂寞楚夢無人憚青兕
東風轉野作晴雷蕩颺山川作紅翠白日下照七澤寬
孤城樓觀失餘寒頗怪故山頻入夢年來真厭楚人餐
園花盛開拒病不能觀作詩諭之

東風著花花披靡
花風吹人人欲醉
老翁逢花如啜醪
強自挹酌終無味
鬪紅鬪綠態千萬
長笑花工夸幻事
若知空色無異觀
世上何曾有桃李

小孤山

一峰枝水孤劍立
古廟開簾雙臉紅
水邊古木老龍蟄
山水色磨青銅
我來扁舟望有禱
萬頃春水清溶溶
明神報我意加厚
嗟我薦獻愧不豐
重遊知復在何日
俯仰天地身飄蓬

初伏大雨呈元咎

初伏炎炎坐湯釜
長安行人汗沾土
誰傾江海作清涼
玄雲駕風橫白雨
普陀真人甘露手
能使渴乏厭膏乳
且欲當風展簟眠
敢辭避漏移牀苦
清貧學士卧陶齋
壁上墨君澹無語
翰林但解嘲苜蓿
彭宣不得窺歌舞
聯詩得句笑出省
策馬涉泥歸閉戶
牀頭餘榼定何嫌
牕外石榴堪薦俎

謝黃師是惠碧菱枕

案此題一本作師是
既碧菱枕短篇價值

羣人作枕堅且青故人贈我消炎蒸持之入室涼風生
腦寒髮冷泥丸驚夢入瑤都碧玉城仙翁支頤飯未成
鶴鳴月高夜三更報秋不勞桐葉聲我老耽書睡苦輕
遶牀惟有書縱橫不如華堂伴玉屏寶鈿敲斜雲髻傾
到陳午憇小舍有任王二君子惠牡丹二槃皆絕
品也是日風雨大寒明日作此詩呈希古

初來淮陽春已晚下里數楹聊寢飯此邦花時人若狂
我初稅駕遊獨懶任王二君真解事來致西槃紅紫爛

天妹國艷照。蔀屋持供佛像。安敢慢江湖。逢春豈無花。
格頑色賤。皆可揀。誓觀中州燕趙態。一洗千里窮荒眼。
風波歷盡還故郡。此願誰知。輒先滿。那知中夕忽凜烈。
卧擁牛衣眠失旦。名園泥淖安可入。坐惜殘芳風雨散。
東隣夫子亦嗜酒。卧聽午雞方起盥。晴明猶及一寓目。
我老尚能揮大醖。

次韻答天啟

黃鍾無聲登瓦釜。蔡子青衫在塵土。逼人爽氣百步寒。

知子胸中有風雨三年河東走鐵馬絕口魚鰕便酪乳
歸來萬卷付一讀不學兒曹用心苦周瑜陸遜久寂寞
千年壯客嘲吳語莫徒彩筆雲錦張要是寶劍蛟龍舞
天兵百萬老西北快馬如飛不出戶眼看六纛出麒麟
走取單于置刀俎

麋猿圖

陰巖萬古無纖塵木石翠潤無冬春時哉兩猿掛復蹲
其一抱子為屈伸下有遊獮意甚馴雄雌嬉遊循水濱

沐猴遇麀愕欲奔據高自得俯而捫懸之門堂閱疑真
妙哉易生筆有神以此成名以終身

謝錢穆父惠高麗扇

三韓使者文章公東裔守臣親掃宮清嚴不受橐中獻
萬里歸來兩松扇六月長安汗如洗豈意落我懷袖裏
中州翦就霜雪紈千年淳風古箕子

聞蛩有感

遙夜飛螢動秋思獨卧空山驚晚歲可堪六月已聞蛩

日暮咿咿響庭際
闕河多風氣蕭索
碧樹先秋早搖落
鳴機夜織常怨寒
白紵吳衫苦輕薄
年年促織誰最悲
堂上美人愁翠眉
清砧搗練對殘月
玉筯啼紅裁遠衣
唐風詩人勸其主
行邁苦遲嗟歲暮
山城聽汝已三年
三年白髮多于故
飄飄秋夢到江湖
我欲東歸繪碧纁
安能為爾將雙淚
歲歲風前沾客裾

赴亳州教官次韻和中書錢舍人及亳州守晁美叔見贈

久知踈慵難應接勉強一官親訟牒羈窮正似鳩無巢
擺去不如魚有鬣從來書史鈍蹊徑更歎詩騷窮事業
幾思狐白易絮纈羞禡舊服求新袂又憐夸毗竟何得
把玩區區一蚊睫久知趨向合飢寒正藉文章漫嚙齧
紫微丈人椽作筆誰得羸師傳諜諜知擒敢慢武侯縱
有弇前知魯侯斂荒蕪滿編求指摘望以餘光分暉煜
乃蒙稱屈力褒揚不意糞壤藏諸篋獲如丘陵飽則可
良御不悅猶非獵平生遇賞有君子處世雖鈍吾知捷

清閒得食學官祿願以詩書填吻頰牙懸喜校鄴侯籤
藤織新成沈郎笈晁公聲名三十載餘事筆蹤傳法帖
紫芝眉宇望不遠屈指數日無旬決黃衫健步書見賜
紫誥除官等何躡久懷薄技待後乘宣管盈囊紙來歛
坐乖前計空惋悵袖裏從今雙手壓醉歸應被官長瞋
來飽徒勞方朔臘

暑毒不可過又每為賓客見擾午寢不安奉懷邴
老之無事也

桃李成塵鶯未老
梧桐未落蛩已多
杜門高卧作閒計
挾策讀書如懶何
頗遭襍穢驚午夢
正坐熱行官不呵
柯山大隱羲皇上
清風一榻無經過

和立之消梅

木奴度淮輒為枳
后皇嗇之理應爾
青梅千里江南春
何時相逢車馬塵
我衰病齒不能酸
微香觸鼻舌生泉
想見曹瞞老狡獪
指林駐馬三軍前

送歐陽經赴蒲圻

異時堂飲洋川酒幾喚扁舟度樊口兩山泉石多故人
送子南行一回首蒲圻小縣聊讀書當使里閭無呻吟
結束歸來接臺省不應厭食武昌魚

蘇叔黨呂知止許下見訪叔黨有詩戲贈以此奉
答

三年齊安有江山可當中原故人面北來塵埃逢故人
眼前卻作江山見君似江山定不疎能出吾言世亦無
蘇郎下筆妙無敵呂郎與談驚未識鳳雛驥子未宜輕

囊空各有千金壁
贈君錦繡與瓊瑤
報我琅玕金錯刀
溪毛潢汙未相棄
歲暮與君甘緼袍

不寐

荒庭雨多秋草侵
秋蛩相語秋夜深
草蟲暗飛羽格磔
星河影高天淡白
騷人多懷夜不眠
老松微吟風颯然
山川浩蕩何日還
晚空漫漫白露寒

對蓮花戲寄晁應之

平池碧玉秋波瑩
綠雲擁扇青瑤柄
水宮仙女闌新妝

輕步凌波踏明鏡彩橋下有雙鴛戲曾託鴛鴦問深意
半開微歛竟無言裊露微微洒秋淚晁郎神仙好風格
須遣仙娥伴仙客人間萬事苦參差吹盡清香不來摘

上元旦早起贈同遊者

夜來人散殘更月曉陌空存舊車轍彩燈城市已春風
寒木人家猶臘雪強起相逢酒未醒殘膏宿火尚熒熒
歸來更拂障泥錦重約黃昏信馬行

贈李德載

男兒當讀五車書，
輟業應須蓋棺日。
人生事業要強學，
譬彼欲耕須逮濕。
李郎落落奇丈夫，
美玉應須作圭璧。
請將便腹包五車，
汲汲講摩如故疾。

蒙恩守東魯，
不意流落之餘。
聖朝升之藩鎮，
感而成詩，復用李文舉韻。

我詩四十心不動，
寵辱悠悠付春風。
聖朝湔洗諸老成，
顧我衰晚名亦共。
魯人詩書久寂寞，
間壁不歸書府送。
道衰洙泗忽千載，
後來為政誰輕重。
平時擇守要有補，

豈但坐使民供貢吾邦邑子有游夏未肯無言受愚弄
天王有意蘇疲俗何術與紆鞭箠痛應須問道東家翁
必也斯民使無訟

遊武昌

一葉橫江凌浩渺李君見我迎門笑鵝黃初熟醅旋壓
書室焚香地新掃淋漓歌笑不知夜竹榻枕藉眠諸少
老人被煖覺獨晚驚起東南日如燒四明陳子定愛客
生火寒廳邀我到盤盤香潔具俄頃鱸斫寒魚初出沼

仲謀霸氣久寂寞元子亭基尚危峭荆榛荒梗上石磴
人物清江開野廟暮投明府快一飲主意殷勤賓屢酬
星河破碎歸中夜明日清淮理歸棹王家園館靜人眼
挂壁於菟疑欲齧殺雞為黍辦倉卒看畫烹茶每醉飽
還家閉門空寂歷勝境目前皆了了茲遊可再誰汝嗇
老懶似不能輕矯西山得霜瘦如削蕭寺崢嶸出粉籐
幸予腰髀猶足使與子凌寒恣遊眺

春日

堂堂春日躍出山郊原草木皆清新千紅萬紫各有態
正自酬酢勞精神短籬誰家小桃李雖復幽陋亦可人
但知痛飲莫辭病數年幽憂難具陳

送孫志康赴高陽

三觴草草豈足飲聊具數刻留君歡年來故友半零落
每念及此傷肺肝淮陽窮栖幸見子胃中鬱結為少寬
奈何舍我去不顧薄宦謀食何艱難陳郊窮秋苦雨霽
積雨未受短日乾念君匹馬走坡坂蒙犯霜雪勤征鞍

吾遭坎壈皆自取之燕何得南其轅雖然男子豈常爾
且復養此凌雲翰

贈李德載二首

我家外翁天下士欲以文章付孫子愛君卅角已食牛
屬書筆下無停字願君飽讀大父書學到莫憂名不似
重教我輩見風流更以餘波變鄉里

長翁波濤萬頃陂少翁嶢秀千尋麓黃郎蕭蕭日下鶴
陳子峭峭霜中竹秦文菡藻舒桃李晁論崢嶸走金玉

金史四庫全書
卷十
六公文字滿人間君欲高飛附鴻鵠

秋曉

老人不睡秋夜長五更鼓角鳴東堂悲蛩牀下欲無語
黃葉瓦清新有霜雁聲相應江南北斗杓欲下天中央
老人山尊有美酒岸中先酌一杯嘗

東方

東方未明更五鼓星河寥寥寒雁度鐺鐺鳴鐸誰家車
陌上驅牛輾霜去北風吹面足踏冰村南早飯天未明

年年輸稅洛陽城
慎莫後期官有刑

寒蛩

寒蛩振翼聲騷騷
夜深月影在蓬蒿
老人雖眠曉不交
愁牕人寂燈無膏
荒城鳴金睥睨高
北斗下挹江南濤
悲笳三奏老雞號
晨光出山開汰寥

秋雨小酌贈賈七

出門秋雨泥漫漫
嗟我后土何時乾
官曹事休歸舍卧
破屋淅淅西風寒
弱妻傾榼勸我起
稚子笑語爭杯盤
我生樂事但如

此為爾一醉愁腸寬仕途翩翩鬪巧捷華裾鮮豔相追攀老
來百事覺羞恥懶伴兒女塗鉛丹賈郎豪華獨異我粉腮玉
指雙鵝鬟清眸侑酒醉百醖肯咀貧窶寒釐酸堂前菊花日
以好落砌槭槭梧桐殘當謀痛飲待九日豪氣一壓龍山桓

山海

愚公移山寧不智精衛填海未必癡深谷為陵岸為谷
海水亦有揚塵時杞人憂天固可笑而不憂者安從知
聖言世界有成壞況此馬體之毫釐老人行世頭已白

見盡世間惟歎息
俛眉袖手飽飯行
那更從人問通塞
將至官坡登一土岡望復州作

茫茫夢澤連禾黍
斷壠橫岡散平楚
登高試望竟陵城
孤煙落日知何處
舊遊如夢去
莫挽客愁冉冉還如故
他年若問鴻軒人
堂下薔薇應解語

送子野大夫罷充倅歸汶上

愛君記覽老不衰
日日早起先鳴雞
白頭未蒙國士知
佐郡秩滿寂寞歸
我辭魑魅得一麾
逢君話舊相嗟咨

卷十
幾年東壁無光輝不知武庫實在茲上書薦君非我職
臨分一醉當無辭

晨起苦寒

夜霜漫屋風折竹我乃與君在空谷平生一衲度嚴寒
塊守深爐體生粟大潘借馬貧監河小潘無事仰屋歌
妻兒號寒劇雁鵝詩書滿腹將何如

舟次安州孝感縣偶感寒疾卧病舟中復大風不
可解舟晚方離去

船頭風聲鳴萬鼓扁舟繫纜沙邊樹船中病客晝閉篷
睡起空江日亭午雞犬蕭條數家縣市聲已變淮南語
長年三老喚不醒一葉波間去如舞

和大雪折木

季秋木葉未全落西風卷雲飛雪作奔騰傾倒來不停
頃刻山川失寥廓白頭老翁仰天歎一生未見可吁愕
但悲無食饑凍死何暇更議陰陽錯樵車不來掾數盡
仰徹屋茅烹菹藿坐愁窮臘安可度律管未改初冬朔

我居堂前有大榆百年老幹龍鱗剝夜聲疑是神物伐
參天大枝脆如斲披簷擲瓦事未測起坐明燈徹其幄
命乖久遭窮鬼笑當慮壓覆崩厥角鹿山長官當此時
高樓大飲縱歡譁兩邦相隣無百里誰謂同時異憂樂
尚能怨嗟念窮苦喜君子物心不薄百里饑寒仰長官
勉充此心救民瘼

冬懷二首

牕南積雪高三尺二更月出連牕白爐裏石瓶鳴細泉

燈前病叟攬書策家人歲晚貯梨栗倒榼寒醪有殘滴
三杯取醉萬事平魚味重裘定何益

山陽賢者有徐子親沒十年哀不已精誠感天天為悲甘露常
沾墳樹枝徐子行年過五十衣不披體常苦飢天公盍使少富
足甘露萬斛真何為虛恩浮惠天猶爾安得世人無巧偽

和應之簷雀

羣兒探雀雛雀母悲且鳴萬物雖異性愛子均一情母
心予子誰不憐爾胡棄子當道邊諒非人情不如鳥使

之至此必有原

自廬山回過富池隔江遙禱甘公祠求便風至黃
漚酒而風轉日行二百里明日風猶未已又風勢
徐緩不奔駛可畏甘公蓋吳將甘寧云

江邊古祠吳甘公往來祭禱嚴且恭我離匡山已經宿
舟挽不進篙工慵沙邊朝服遙致禱澆酒未竟天回風
一帆百里至還作不徐不疾來雍容我生久已甘困滯
神亦何事特哀窮但疑神理與人異意誠詞直無不通

林皇夜泊若平地疑有鬼物驅蛟龍天明旗腳向北指
舟子笑語開船蓬

元符庚辰某同男秬率潘仲達同遊匡山六月望日
齊安罷官步登客舟過樊口李文叔棹小舸相送遂
下巴河上靈巖寺寺有何與很石記云昔孫仲謀伐
壽春于此祀天祭江刑白馬故山名馬祈寺有法堂
頗華敞因與潘李飲酒賦詩其中明日至蘄陽登梁
昭明太子廟遂宿具禱順濟乃發候風林皇港見江

中黑物類獺又有尾鬣相逐馳久之激水高數尺風
定而去過道士磯石壁色正青插水中又十里所過
五兩磯遂泊富池禱甘公祠晨發富池望匡山諸峰
半皆在雲中晡時至潯陽捨舟登陸晚宿太平觀冷
翠亭時十八日也十九日過鄒志完晚大雨將醺雨
霽中夕醺罷復雨觀人異之二十日遊東林觀神運
殿禮遠公像見晉安帝輦遊達磨院遂登白公草堂
讀歐陽文忠公題石上五杉閣而歸晚浴東林納涼

神運之南望香爐天池化城二十一日出山此其大
畧其詳屬潘郎潤色

風駛浪湧仲達喜其快因作一篇

人生不欲甚快意遲速到家還一致向來白浪涌如山
舟中呀呬幾喪氣我師禪祖學不動頗覺蒼茫忘定慧
憑河不悔聖所非君勿為笑而為戒

柯山集卷十

欽定四庫全書

柯山集卷十一

宋 張耒 撰

七言古詩

美哉

美哉洋洋清潁尾西通天邑無千里舸艤大艑起危檣
淮潁耕田歲收米茫茫陂澤帶平原古時溝澗還相連
昔人屯田戍兵處今人阡陌連丘墓今年雨足種麥多

北風吹葉鳴空柯高城回望鬱嵯峨豐年間井聞笙歌
河邊古堤多老柳去馬來船一回首百年去住不由人
歲暮天寒聊飲酒

西風

西風吹屋絡緯鳴星河錯落已三更軍城傳警萬家靜
山堂含風遙夜清雲收纖月映山盡天轉北斗向江傾
舍南高林栖鶴鷄危枝高巢雛夜驚

觀梅

北風號夜天雨霜屋東梅花晨洗妝老人旦起萬境寂
一笑向我吹微香風月精神珠玉骨冰雪簪珥瓊瑤璫
天姝星艷下人世靈真高秀無比方老人年年被香惱
學道無力時清狂吟詩覓句苦無味剪枝插頭羞鬢蒼
眼窺手採心愛惜尚可取餌充朝糧不如痛飲臥其下
醉魂為蝶棲其房

魯直惠洮河綠石研冰壺次韻

洮河之石利劍矛磨刀日解十二牛千年邊地困沙礫

一日見賓來中州黃子文章妙天下獨有八馬森幢旒
平生筆墨萬金值奇煤利翰盈篋收誰持此研參案几
風瀾近手寒生秋抱持投我棄不惜副以清詩帛加璧
明牕試墨吐秀潤端溪歙州無此色野人齋房無玩好
慙愧衣冠陳裸國晁侯碧海為文詞盤薄萬頃澄清漪
新篇來如徹札箭勁筆更似劃沙錐知君自足報蒼璧
愧我空賦瓊瑰詩

福昌秋日效張文昌二首

秋野無人秋日白
禾黍登場風索索
豆田黃時霜已多
桑蟲食葉留空柯
小蝶翩翩晚花紫
野鶉啄粟驚人起
洛陽西原君莫行
秋光處處繫人情

黃葉蕭蕭秋水清
田中日午村雞鳴
場邊九月禾黍熟
空原雉飛飽新穀
叢籬蟲鳴村路曲
道邊古墳生野菊
人稀田濶草茫茫
洛陽秋聲能斷腸

贈張嘉甫

浮舟大江里三千
歸掃先隴清淮壩
杜門古寺厭岑寂

夢寐清潁如家山汝陰昔謬稱刺史自愧何術甦惘瘵
平生為吏甘賤拙敢作蠹賊傷民田未憂懷甄擊之去
乃欲築室買一廬簞瓢三畝易辦耳寄聲父老不汝干
長淮清冬龍蜃蟄放舟出郭天宇寬浮梁橫前嫋可纜
金塔卻立儼莫攀髯張幼好此奇服白壁刻佩鳴玦環
抱持微學不忍棄清明竹林遭削刪三年江湖友魑魅
一日寶府觀璵璠漸消鄙吝心自喜追計存沒涕亦潛
尋山把酒豈易得客路霰雪衣裘單塵埃可洗憂可豁

待君一酌玻璃泉

題江州琵琶亭

危亭古榜名琵琶尚有楓葉連荻花嗚呼司馬則已矣
行人往來皆嘆嗟司馬風流映千古當日琵琶傳樂府
江山寂寞三百年潯陽風月知誰主我今單舸犯江潭
往來略已遍東南可憐千里傷心目不待琵琶淚滿衫
予官竟陵時李文舉嘗以事至郡同遊西禪刹陸
子泉烹茶酌酒甚歡也今歲予移官齊安文舉自

武昌渡江過我與之飲酒念西禪舊事相與慨然
此生放蕩隨羣動一覺竟陵瀟灑夢江山喚我此中來
卻愁風月無人共李侯年少能思我竭來兩槳歸潮送
不辭薄酒與君飲坐覺西山夕烟重西禪舊遊已陳迹
壁間陸子塵生供石欄古井誰知味只有松風自成弄
愛君為吏無俗韻快誦離騷飲仍痛不嫌寂寞過我來
古縣年豐少爭訟

乞錢穆公給事丈新賜龍團

閩侯貢璧琢蒼玉中有掉尾寒潭龍驚山作春山不覺
走馬獻入明光宮瑤池侍臣最先賜惠山乳泉新破封
可得作詩酬孟簡不須載酒過揚雄

將至都下

竟陵南望稻新熟夢澤悠悠傷遠目春風嶺上望齊安
太昊城邊攬秋菊那知歲暮東州客太山蒼寒曉霜白
雲收霧捲日月明却上天衢瞻五色敝裘疲馬古道長
九旬刺史歸空囊歸去故人應笑我滿衫清淚說潯陽

題韓幹馬圖

頭如翔鸞月頰光背如安輿鳬臆方心知不載田舍郎
猶帶開元天子紅袍香韓幹寫時國無事綠樹陰低春
晝長兩髯執轡儼在傍如瞻馳道黃屋張北風揚塵燕
賊狂廐中萬馬歸范陽天子乘騾蜀山路滿川首蒼為
誰芳

罔沙阻風

大江春風浪如屋客舟迎風罔沙宿連檣接柂古岸傍

岸頭無人春草綠船頭日出炊烟起買魚携菜來就市
漁人水惡不出門蕭條野市無雞豚堤邊紙錢灰若雨
沽酒賽神巫降語南人艇子不避風橫江五兩翩翩去

寄曼叔求酒

青衫幾丞頑不差三十持板拜督郵歸來無物與消愁
典衣沽酒寒無裘囊空酒貴不可得縮手愁坐凝雙眸
秋風破屋冷颼颼夜長不眠吟掉頭豈無鄰家酒可偷
簡書縛汝如窮囚淮陽冬醪滑勝油唇焦不飲已經秋

汲公直聲聞九州小子昔也從公遊憫憐憔悴賜顏色
時丐餘酌濡其喉軍厨嵯峨糟作丘萬甕沸響玉蟻浮
轍魚所願斗水遊不敢多取煩陽侯玉餅未至涎已流
想見漱灑浮金甌歌成緘書還自咻一醉猶須越境謀

題吳熙老風雲圖

雨脚橫空萬牛弩烈風吹山山欲仆草披木拔何足道
大江翻濶失洲渚路旁失轡者誰子道阻且長泥沒屨
鞭驢挽車亦何急目眩心搖行不顧我生飄蓬慣羈旅

顧爾艱難逢亦屢衲被蒙頭不下堂且與身謀安穩處
京師阻雨二首

深泥漫漫汚后土長安閉門三日雨頑雲不動風伯愁
飛電更相雷師怒陽烏力弱不自持天漏已寬無石補
麥蛾禾耳不足憂當念為魚救無禹

大雨三日泥三尺駿馬高車行不得我有蹇驢安敢騎
閉戶高眠朝至夕誰家高堂半夜秋軟綺輕紈換締綌
朱門樂事無時無爾自賤貧空太息

應龍

原注 海州胸山有
龍潭人傳有龍

應龍未遇風雲起仰活泥沙數尺水彼能坐致千里澤
可憐一掬何難致時哉未遇可奈何一掬雖微安敢易
誰能寄語潭中魚相聚須臾莫相忌

田家三首

野塘積水綠可染舍南新柳齊如剪去冬雪好麥穗長
今日雨晴初擇繭東家饋黍西舍迎連臂踏歌村市晚
婦騎夫荷兒扶翁月出橋南歸路遠

社南村酒白如錫鄰翁宰牛鄰媪烹插花野婦抱兒至
曳杖老翁扶背行淋漓醉飽不知夜裸股掣肘時歡爭
去年百金易斗粟豐歲一飲君無輕

新見鵲銜庭樹枝黃口出巢今已飛粟留啄榘桑葉老
科斗出畦新稻齊田家苦作候時節汲汲未免寒與飢
去來暴取獨何者請視七月幽人詩

海州道中二首

孤舟夜行秋水廣秋風滿帆不搖槳荒田寂寂無人聲

水邊跳魚翻水響河邊守簷茅作屋簷頭月明人夜宿
船中客覺天未明誰家鞭牛登隴聲

秋野蒼蒼秋日黃黃蒿滿田蒼耳長草蟲唧唧鳴復咽
一秋雨多水滿轍渡頭鳴春村逕斜悠悠小蝶飛豆花
逃屋無人草滿家累累秋蔓懸寒瓜

女兒祠下

山邊白雲閣不掃廟前土馬荒春草山下松花龍甲光
東風古柏吹煖香朝霞為裳水為佩守廟千年老龍在

清風掃堂神暮還山頭月出溪潺潺

馬周

馬周末遇虬鬚公布衣落魄來新豐一樽獨酌豈無意
俗子不解知英雄賢豪相逢自相得一語君王見胷臆
當時豈不為人言聾耳安能為君側

南山

南山鳳凰雙翅垂口不安食腹苦飢山前老鳶飽腐鼠
憑恃風日羣遊嬉俯身視鳳有驕色鳳不汝較空嗟咨

九韶一奏為君舉坐看百鳥相隨飛

福昌北秋日村行二首

秋野無人秋日白
黍黍登場秋索索
豆田黃時霜已多
桑蟲食葉留空柯
小蝶翩翩晚花紫
野鶉啄粟驚人起
洛陽西原君莫行
秋光處處傷人情

黃桑蕭蕭新雨晴
田中日午村雞鳴
場頭九月禾黍熟
空原雉飛飽新穀
棘籬蟲鳴村路曲
路邊古墳生野菊
人稀田闊草茫茫
洛陽秋聲能斷腸

歲暮數三首

秋日苦短秋雲多北風蕭蕭洛水波

素此下
脫一句

長林撐空

葉餘柯鳴雁高飛去不息晚花悠悠能幾何洛陽經年
客未去歲暮搔首空悲歌

寥寥野空禾黍荒北風日夜鳴空桑南山碧天青不極
渺渺洛水東流長山空水寒行客少鴻雁飛急天初霜
蕭蕭窮谷歲已晚嗟我再補冬衣裳

南山蒼蒼秋季月北風如刀青石裂山陰半夜寒欲冰

晚望高峰看新雪白衫少年臂鷹去暮歸飲酒烹孤兔
強弓一斛尚可彎更欲射獵窮吾年

一畝

一畝秋蔬半成實竈突無烟已三日良人傭車斃車下
老婦抱子啼空室秋風九月天已寒飢腸不飽衣苦單
我身為吏救無術坐視啼泣空沈瀾

洛水

洛水秋深碧如黛亂石縱橫瀉鳴瀨清明見底不留塵

日射澄沙動璣貝南山秋風已蕭瑟倒影上下迷空翠
何當載酒縱扁舟一尺鯉魚寒可鱸

秋風三首

秋風蕭蕭洛川渡水碧沙寒飛白鷺波頭伐木欲成梁
落日樵蘇下山去山頭九月雪一尺山民燃薪當襦袴
石田收薄婦子飢歲晚苦寒安可度

秋風蕭蕭吹野桑田家黍稷初登場雉肥兔飽鷹隼健
水落沙冷魚龍藏長淮烟波渺千里悵望搔首山川長

二年薇蕨苦不飽長安裘馬多輝光

昏鴉歸栖暮天迴新月娟娟水中影秋聲索索起桑麻
古道人歸烟火靜公庭吏稀霜樹老藥檻雨多幽菊盛
山家生事飽暗知野果村醪遣朝暝

感春三首

我昨西來到昌谷主人致酒留我宿坐中少年美如玉
高歌清惟春夜促還家病酒對殘春東風落花吹滿屋
出無與語歸閉門安得萬里馳吾足

我昔東行花始開我自東歸花半摧萬紅辭林捲風去
坐見錦繡蒙蒼苔南山朝雲鳩逐婦日暮微雨蕭蕭來
一春晴明苦難得掩蔽風日知誰哉

悠悠朝興暮還息官閒事少門無客空山多陰春雨足
飢馬蕭蕭空伏櫪文章工巧謀愈疎顏鬢衰遲進無策
繫身五斗爾自為何用中宵空嘆息

又三首

亦知春歸不可留有情未忘寧免愁平田茫茫芳草合

清洛不斷波悠悠傷心千里寄雙淚催老此身初白頭
問舍求田未成計青衫手板對人羞

山民為生最易足一身生計資山木負薪入市得百錢
歸守妻兒烹斗粟山林未盡終不憂衣食自足他無欲
人生誰使愛功名萬慮千思撓心腹

騎馬出門暮復歸出無所詣歸對誰妻兒具酒勸我飲
兒稚笑語傍嬉嬉人生如此亦可樂安用軒冕生光輝
九原可作欲誰與鹿門龐叟真吾師

去年

去年四月多風雨麥秀不實農夫苦今年麥好風雨調
萬口嗷嗷飢待哺何事今晨還衣袂朝日無光寒慘切
天工與物無怨尤安用日與人為仇

謝李剛中

齊郎好詩風調清語中有骨自老成愈饒愈出當有名
竭來宣城蓋為傾文章不如金滿籬我昔曾力今乃懲
少年平步取公卿安用學此誤平生

局中負暄讀書三首

輝輝短景留寒光重裘不煖貪負陽老人背溫一體康
我欲持之獻天王天王九重居明光玉几翠被女侍傍
人不我知謂我狂此心耿耿不敢忘歲云暮矣天雨霜
且復持此飲一觴

輝輝短景留寒光瓦簷霜濕梧桐黃老蛩不知秋已去
白晝嘖嘖空啼墻歲云暮矣羈旅傷塊獨守此天一方
牀頭書史談虞唐我言匪耄聽者狂

輝輝短景不能春
照我貧屋亦復仁
虞淵道遠寒雲屯
羲和愁思墮厥輪
君不見志士憔悴甘
賤貧塊處屋漏
含悲辛重堂溫室
顛醉昏昏悠悠蒼
天彼何人

歲後三日

春風攪空如怒濤
春日寂寂在蓬蒿
衡門烏雀舞不下
西園桃李氣已嬌
天邊碧雲空漠漠
門外荒草還迢迢
人生幾何春復夏
可但白首隨漁樵

和陽念三自武昌至京師

三年別我客荊州一日長安從我遊
愛君詩有春草句使我神遊黃鶴樓
江山望爾欲穿眼見我驚嗟秋鬢短
扁舟可辦吾欲東年來五湖魂夢中

二十三日晨欲飲求酒無所得戲作

張君所欲一壺酒百計經營卒無有
夜來客至餅已空晨起欲飲還戒口
努力忍窮甘寂淡人間萬事如反手
百壺一醉有底難造物戲謔君須受

贈翟公巽

我昔出守來丹陽江流五月如探湯使君之居在山腹
繞舍樹石何青蒼千年藥根蟠井底靈液浸灌通寒漿
人言枸杞精變狗夜吠往往聞空廊金山蕩潏浪花裏
一舸遙去隨魚郎最奇巖齋人跡少乳水時滴白石牀
翠龜坡陀負日色白躡掀舞占風祥我泊金山凡十日
窮探力取無遺忘南風吹我渡江去已厭淮南塵土黃
二十年間多少事身如疲馬起復僵淮南窮栖衆人後
朝食不充藜苋腸公來衰顏得一笑側聽高論驚尋常

窮閭過我坐至暮滿懷珠玉無秕糠乃知世間有清議
未可盡以已意量精金白璧天所寶理無破碎委道旁
半年耳冷不聞此過公矍然神激昂論文自顧已老醜
從事理絕隨飛翔斯文有屬不但爾因公作詩我涕滂

讀中興頌碑

玉環妖血無人掃漁陽馬厭長安草潼關戰骨高於山
萬里君王蜀中老金戈鐵馬從西來郭公凜凜英雄才
舉旗為風偃為雨洒掃九廟無塵埃元功高名誰與紀

風雅不繼騷人死水部胷中星斗文太師筆下蛟龍字
天遣二子傳將來高山十丈磨蒼崖誰持此碑入我室
使我一見昏眸開百年廢興增歎慨當時數子今安在
君不見荒涼渢水棄不收時有遊人打碑賣

將至嶺下作

竟陵南風稻新綠夢澤悠悠傷遠目春風嶺上望齊安
太昊城邊攬秋菊那知歲暮東州客太山蒼寒曉霜白
霜收霧遠日月明却上天衢瞻五色敝裘疲馬古道長

九旬刺史歸空囊歸去故人應笑我滿襟清淚說淮陽

塞獵

十月北風燕草黃燕人馬飽弓力強虎皮裁鞍雕羽箭
射殺陰山雙白狼青氊帳高雪不濕擊鼓傳觴打令急
單于半醉解貂裘昭君獨抱琵琶泣

耒病臂比已平獨挽弓無力客言君為史官何事
挽弓戲作此詩

君不見吾鄉少年曹子桓文章七步相後先有時擲筆

事戈獵邀輕截駁馳平原藏豹名弓燕代馬射雉歸來
燕清夜一聞驚倒荀令君何物書生乃知射我雖把筆
笑腐儒束腰待懸玉鹿盧自從病臂憂親友百嗜為之
心一枯降癘無名天悔禍奪之而與復完軀但慙未使
杯安肘猶負當年門掛弧便使淒涼身未伏畧聞弓馬
氣猶麤莫謂早衰須袖手將軍臂折尚平吳

踵息齋

物之有知者恃息物之有息知為賊天長地久載元氣

天地無心故無極君知一身誰主持六塵緣影工伎兒
發生變幻不暫止令汝鼻息無停時喘呼呀呬生至死
去今已遠何由歸真人嗒然吾喪我能使炎火為寒灰
中空無宰氣不使內自升降如靈龜深之又深乃至踵
根深蒂固凝不動超然內外無死地梨棗華實龍虎用
真人示我尺素書萬卷丹經不勞誦他年綠髮對銅狄
卻視吾齋真作夢

喜晴

朝看東南雲物好便有清風收濁潦吾知天意將悔禍
約束蛟龍便粳稻山川轉眼異明晦冠屨宜人亦輕燥
微涼入堂酒味好一杯徑醉愁如掃清幽枕簟東牕下
曉睡老雞呼不覺

大風與楊念三飲次作此

北風黃雲卷飛沙吹暗長安百萬家溫爐對酒慎勿出
且看酒面生浮花我為吟詩說雲夢荆江洞庭方洶湧
吟成飲君三百盃莫學雪中驢酸哀

寄道公

知公鼻祖冬之日謫向江山冷無匹粹然真氣滿輕軀
自言位次神仙秩同輩幾人始謝老惟公躑躑居第一
驚腰不舞自欲飛神屨瞥波原不濕永巷春深簾幕幽
西都有人名莫愁我老摧頽乖舊約空能時作夢中遊

柯山集卷十一

欽定四庫全書

柯山集卷十二

宋 張耒 撰

七言古詩

東海有大松土人相傳三代時物其狀偉異詩不能盡因讀徐仲車五花柳枝之作作此詩以激之
詩翁愛花復愛柳長歌高吟半酣酒自言二物天下奇
愛之不厭形于詩嗟予所愛翁未見我昔東遊窮海甸

波濤四絕大島中上有太古不死之長松千人祔延生
其下仰見翠葉迷蒼穹巨鰲竭力負不起鵬栖僅借卑
枝容人言海若此其圍鱗甲百萬屯蛟龍又云海怪久
不死守護山麓蟠其躬天空海濶風力壯鼓憂簸蕩聲
無窮軒轅張樂奏未已筍簾百萬喧笙鏞鬼神不欲人
屢見護以萬疊青山峰爰之未免困寂寞坐見雨露霑
蒿蓬東臯吟翁天下才海岳秀氣天所鍾豈惟文章繼
騷雅胸中術業窺夔龍如何

案此下
脫五字

失所因與茲松同

詩翁勿愛花與柳軟弱但解爭纖穠春英零落化為土
夏葉狼藉工巢蟲嬌兒姍婦最入眼丈夫所志當英雄
何當與君涉海去結茅松下甘長終

讀蘇子瞻韓幹馬圖詩

我雖不見韓幹馬一讀公詩如見者韓生畫馬常苦肥
肉中藏骨以為奇開元有臣善司牧四十萬匹屯山谷
養之罕用食之豐力不曾施空長肉韓生圖像無乃然
我謂韓生巧未全君不見昔時騏驎人未得飢守鹽車

惟有骨昂藏不受塵土侵伯樂未來空佇立騏驎乏食
肉常臞韓生不寫瘦馬駒誰能為騏驎傳之圖不如凡馬
飽青芻

再和馬圖

我年十五遊關西當時惟揀惡馬騎華州城西鐵驄馬
勇士十人不可羈牽來當庭立不定兩足人立迎風嘶
我心壯此寧復畏撫鞍躡鐙乘以馳長衢大呼人四走
腰穩如植身如飛橋邊爭道挽不止側身逼墜壕中泥

懸空十丈纔一擲我手失轡猶攢蹄回頭一躍已在岸
但見滿道人嗟咨關中地平草木短晝日散漫遊忘歸
驅馳寧復受鞭策進止自與人心齊爾來十年我南走
此馬嗟嗟入誰手楚鄉水國地卑汙人盡乘船馬如狗
我心未老身已衰夢寐時時猶見之想圖思畫忽有感
況復慷慨吟公詩達人遇境貴不惑世有尤物常難得
寧能使我即無情搔首長歌還歎息

宿龜山寺下贈旻師

淮流赴海何時窮我生飄泊西復東山中老僧舊相識
驚我非復當時容三年厯遍百憂患遷就汲汲如飛鴻
人生易老古所歎如我安得顏長紅塵埃漫滅舊題壁
枝葉已拱當時松我方奔走師已老更念別此何時逢
眼着故舊懷抱好宴坐不覺聽山鐘長淮日高人語絕
惟有塔鈴鳴夜風

寄子由先生

先生四十猶不遇獨坐南都誰與語青衫弟子天下窮

飢走京城困羈旅高門得飯暫見肉敝筐無實惟巢鼠
樓頭酒貴不敢沽三百青銅輸杜甫強顏講學昧時宜
漫自吟詩愁肺腑平生不解謁貴人況乃令嚴門者拒
此生自料應常爾但願流年醉中度又思人世樂乃已
此外紛紛何足數豫期歸日在涼秋想見西風蕩煩暑
區區懷抱冀披豁一尊願駐東歸舫

再寄

宛丘之別今五年汴上留連纔一日殘生飄泊客東南

憂患侵陵心若失先生神貌獨宛然但覺巖巖瘦而實
有如霜露入秋山掃除繁蔚峯巒出自言近讀養生書
頗學仙人餌芝朮披尋圖訣得茯苓云是松間千歲物
屑而為食可不飢功成在久非倉卒上倖金石免毒裂
下比草木為強崛涓涓漱納白玉津鍊以真元納之骨
神仙自是人不知豈為難求廢其術我聞公說心獨嗟
欲問太虛窮恍惚奈何不使被金朱乃俾枯槁思巖窟
又觀世事不可常倚伏誰能定于一終身軒冕亦何賴

況有朝升而暮黜何如端坐養形骸壽考康寧無天屈
乃知豈即非良圖卻笑兒曹嗜糠粃青衫弟子皆受經
賦分羈窮少倫匹自知無命作公卿頗亦有心窮老佛
但思飽煖願即已妄意功名心實不終期策杖從公遊
更乞靈丸救衰疾

寄楊應之

應之蹉跎三十九猶着青衫困塵垢高才逸氣老益奇
我每事之安敢友逢時則駕子何患有才未用誰之醜

暴得從來失常速徐驅未用鞭其後掃除萬事付之命
收拾至樂歸之酒聞公頗以飲自名我亦抗衡能至斗
京師常恨酒不足貧旅僅得餬其口乃知一飲尚間關
功垂萬古知難偶百年痛飲乃良圖安用金朱裹枯朽
我生自斷計已決君亦我徒能爾否揚眉鼠子事輕肥
貶眼小兒夸謹厚須防仰嚇忌鵷雛更慮致魘逢鴛狗
獨醒不若鋪其糟羣犬猶須避而走遭刑每笈嵇叔夜
得計須師彭澤叟我官古邑洛之陽間有山川亦奇秀

行當釀秫從子遊更以新詩相獻侑

招潘郎飲

老人夜短睡不足勃公牕外強知時五更未明語千萬
更憎林間鷦鷯吹紅洗白雨三日吾園花在已離披
一年春事坐如此白首窮謫歸無期念此徑須沽酒飲
買魚烹肉勤妻兒更呼東隣好酒伴為我醉倒堦前泥
郭圃送蕪菁感成長句

蕪菁至南皆變菰菰美在上根不食瑤簪玉筍不可見

使我每食思故國西鄰老翁知我意盈筐走送如雪白
蒸烹氣味元不改今晨一日如還北孔明用蜀最艱窘
百計掇拾無遺策當時此物助軍行渭上褒中有遺植
英雄臨事究瑣屑終服奇才屈強敵想見躬耕自灌畦
當時有意誰能測

讀守道詩

仁宗之初公有聲一世懦者聞之驚日行古義不顧俗
師事孫子傳其經掃堂捧杖供賤役侍師之坐隨師行

質疑問道無敢變當世始知師與生作為文章不徒發
譏切時事非公卿俗儒毀譽無所出乃取過行為譏評
過于仁義罪固小矯弊自合違中行人皆不及子獨過
過者之罪誰為輕開編偶誦子詩句辭氣磊落嚴以清
吟哦令我不能舍想見眉宇寒崢嶸高風一泯不可見
安得壯士能經營惜哉朽骨不可作徂徠廢土知誰耕
對雪呈仲車

學堂歲暮無來客殘雪漫漫風獵獵當庭古柳三四枝

老翁攜帚收殘葉二年間散百事慵飢寒不自勤鉏鍾
囊空甑倒誰復救典衣買酒將空篋人間萬事苦難齊
以醉驅愁最奇捷大夫未死誰能測幽憂何自同兒妾
飲酣耳熱詩興豪直上虛空恣凌躡飢喉凍噤誰與解
正藉醺酣得嚙嚼少年舉白未嘗辭漸老深杯見還怯
何當共有種秫田免向官壚走書帖

昨者

昨者飛電幾破屋頗說四郊妨麥熟十日霖雨一日晴

泥潦漫漫不容足淒風寒涼肅肌骨五月更衣初秋服
草木傷摧亦可憐造物憑陵竟何欲陰陽錯行成疫癘
君子慎疾防寒燠荒涼窮巷幸無他更勸高眠飽饘粥
己未四月二十二日大雨雹

夜來飛雹驚我眠大者磊落幾如拳起聽但覺屋欲動
簷瓦破墜無復全是日晚晴星斗出鏡靜萬里無雲烟
乾坤變化竟誰使造作詭怪須臾間鄰家老翁髮已白
云昔見此今十年木衰大濫氣浮洩激此陰沴成冰堅

儒生臆度知是否天事誰得窮其源屋頭雛鴉失其母
足傷翅折亦可憐

遊楚州天慶觀觀高道士琴碁

頽垣蒼蒼鎖喬木草滿荒庭不容足壞簷破壁秋雨餘
蛛網蕭蕭風滿屋黃衣道人出迎客野態生踈脫拘束
圍碁盡掃一堂空烹茶旋煮新泉熟彈琴對客客卧聽
悅耳泠泠三四曲離騷幽怨松風悲流水潺湲履霜哭
日斜携手步空廊鳴鳩相呼竹間宿黃昏門閉人語絕

空殿幽幽掩微燭我生資身最淡薄每厭煩歌幸幽獨
何當不踏朝市塵長伴高人種松菊

惜別贈子中昆仲二首

寒雲崩騰不成雪北風吹牕燈半滅病來廢飲卧無眠
一夜吟詩聲不絕南城三俊生契濶想對寒爐掉吟舌
留行一日誰有情慰我與君千里別道長塵土疲馬愁
歲晚風霜敝裘裂人生何用讀書史文字未補囊中闕
驅馳所幸一飽耳士而謀食愧前哲何能天獨嗇吾曹

自應所學為之孽雖然此事予不悔昔學固知今日拙
欲持琬琰易羊皮玩之已久安能輟萬端畢竟有天命
計較何須論瑣屑勞歌無和坐達明曉鼓鑿鑿墮殘月
我年十八從先生今也相逢得三子坐思前事且十年
嗟我不才老將俟子中兄弟氣清拔粲若瑤環與瓊珥
逸足駿馬不受羈凌蹀奔馳動千里先生聲名二十載
乃得姻婭皆文士我今賀子得所遭非我先生誰辦此
定交自恨相知晚漫浪一官非我志論文終日坐忘歸

欲別出門還頓轡我如輶駒幸芻豢豈不自厭安敢避
人生謀食亦可悲世上舍閒皆失計西來有人話吾邑
頗說山川慰人意寄詩莫憚憑驛傳對酒惜哉無子醉

到官便掃琴書室有客過我行當至

原注子敏已許來
壽安到官便治所

居室疏泉養筍待子吟更采山芻林君驥

原注聞壽安官
舍多脩竹流泉

早作

鷓鴣夜寒不得眠永夜相語高樹顛鴉鳴最早尤喧闐
啼呼相應動百千老雞睡起足拳拳側頭端如聞九天

引吭一唱鳴宮懸時哉不後亦不先朦朧初日見山川
吾廬晨起有炊烟

自南京之陳宿柘城

荒城人稀荆棘老野兔驚跳出寒草蒼蒼落日黃雲西
驅馬城邊尋古道入門四顧皆桑田居民三五依道邊
暮投佛寺下馬立銜眼滿屋燃萁烟老僧自言八十餘
老矣不能營所居村僮依竈展敗席上有空梁懸木魚
旋汲新泉濯雙手青燈照客黃昏後羣兒烟漫眠我前

新月欲傾光入牖夜敲僧室借酒壺不惜青錢取次沽
酒香入戶推枕起剔燈吹火燃銅盃大杯一沃不留滴
滿眼婪然睡來集明朝上馬倒殘壺不怕新霜敗裘濕

送劉季孫守隰州

君家將軍本縫掖叱咤西摧賀蘭石一時成敗何足論
要使英名垂竹帛到君奇骨尚虎頭白鬚千騎守邊州
挿架萬籤供記覽探囊五子擅風流大河之東士精勇
日飲不妨飛獵鞍五更吹角建牙旗萬馬合圍行酒甕

朝來風勁黑貂煖夜惟雪滿青氍重樂哉閉口莫言兵
雖有頗牧誰能用

北原

秋風日夜吹北原秋蕪經霜不復繁紫紆一逕漸可躡
步踏落葉披榛管蕭蕭九月草木變獨有修竹猶禁寒
青紅野實不可辨晚日照射霜榴殷巉巉女几更清瘦
崖壁刻削無雲烟潦收石出洛水好靜夜側耳聲潺潺
原西古城有微路禾黍離離荒野田人家歲熟婦子樂

村巷日暖牛羊閒登臨嗟我幸無事況有美酒供開顏
射麋獵兔可卒歲棄擲萬累休嗟歎

感春

若若堂北桃昨日花猶小暖風遲景一日功萬萼千葩
爛相照東風漾漾吹朝雨朝日滿簷春鳥語櫻桃得暖
花意忙接萼連枝間先吐蘭芽出地長可握小筍如簪
堪薦箸欣欣萬木誰使然時來不肯居塵土盛衰相感
但如此鏡中安得朱顏駐古來百計無可奈惟有飲者

謀猶庶乃知甚急莫如酒有衣可典猶為富我今不樂
欲何待薄俸自給供朝暮功名有命不可求白髮無私
誰得拒從今醕酌勿復辭棄置人間千萬慮

寄陳器之

昨者見君纔頃刻滿馬塵埃面黧黑自言別家春欲闌
歸意如飛留不得玉鞭揮折手成胝一日到家馳四驛
今朝得書一何喜酌酒烹雞稅征輒自言山城無與樂
坐看飛花良可惜手攜婦子口吟詩文字揮毫便千百

醉歌昌谷和我吟錦囊舊句無顏色憐君潦倒誰復省
塲屋十年名烜赫嗟我春來亦何事飽食高眠度朝夕
簾前相對但有山坐上清談更無客逼眼花光羅綺眩
照人酒色瓊瑤白風光似此寧可忍酩酊高歌臥花側
平生結友事遨遊未省流年守山僻強歡獨飲豈所樂
舍此無謀慰愁寂思君一笑何可得王事有程身有役
堂南柳條爭著葉繁李夭桃落如積請看春物能有幾
坐見清和變炎赫須期載酒對東風及此殘花尚堪摘

讀李愬碑

自唐中微北方沸鐵馬長鳴飲清渭李公守節臨賊庭
身死羈縻行萬里

原注愬及盧
奕並傳首

百年事往誰復省一丘

榛莽無人祭荒碑半折就磨滅後人空解傳其字殺身
不畏真丈夫自古時危知烈士俗書小技何足道嗟我
但欲揚其事寥寥獲麟數千載末學褒貶多非是高文
大筆誰復作黜臣餓夫須有待紛紛後世競著述紙墨
徒為史官費卻嗟何獨此事然搔首碑前空嘆慨

和陳器之詩四首

朝應天

原注應天寺有五聖御容官于洛者至則首謁

唐衰五季更披猖社稷反手看興亡山河分裂流戰血
積骨被野號豺狼中原正朔不出境九州豪傑爭侯王
生民禍難寃痛極腥戮上達干穹蒼真人龍飛萬物覩
天命自至誰能當靈旗指揮四海一氣稭殄滅和風翔
降王賜第奉朝謁九服効職爭梯航百年積累到今日
運祚方興乾坤長佛宮原廟廣孝敬嚴致守衛勤烝嘗

陰陰祕寢鎖遺像
轟轟畫戟羅蕭牆
衣冠具列虛仗儼
龍駕不反遺弓藏
子孫億載千萬世
水與清洛流湯湯

過韓城

周京無人弔禾黍
七雄按劍分周土
秦人匹馬出函關
六王割地愁為虜
宜陽古堞故韓都
地接強秦爭戰苦
謀窮運去竟亡國
從長蘇秦亦何補
諸侯已盡秦魏魏
嬴氏已亡秦不知
始皇自是呂家子
宗廟薦享真何為
山河百戰移陵谷
宮殿成塵埋寶玉
秋風壞塚長荆榛

落日空城散樵牧今古悠悠共一丘
爭強蝸角欲何求
誰似令威仙骨健千年重向故鄉遊

弔連昌

唐日西顏半明滅長琴掃天流戰血
六龍不復入東都

原注唐自安史後至
昭宗東遷終不復幸

連昌已有狐狸穴宮前茫茫洛陽

路漢甲朔兵幾回度火焚馬斃百戰場
盡是舊時歌舞

處遊魂不歸宮樹老茂陵金玉人間寶
春耕迤邐上空

山夜燐青燐照秋草女几巉巉青插天
東流洛水自潺

溪興亡一覺繁華夢只有山川似舊年

鹿仙山

真人朝天去不還千年鹿跡留空山空山寂寞何所有
野殿荒涼松檜寒桑田海水移今古興亡萬變誰能數
五雲深處駕飛龍應笑人間換朝暮神仙不與世人期
騎鹿安知不復歸朝嵐夕靄山秀潤應有靈丹相護持
長生可求仙可致浮世腥膻何足嗜君不見漢時九江
梅子真一日辭家隱吳市

長安仲春二首

長安仲春七日風蒼茫頓撼天地同應門縹闕發欲動
况我窮巷連蒿蓬暮寒卷雪連芳草平門萬屋青城縞
無言桃李終默默得勢泥塗常浩浩夕暉入屋人氣活
勞苦羲和間何濶斗杓東指今未行要使燭龍聊潑刺
長安花繁仲春月北風倒山雨成雪窮巷下里袴襦盡
老翁稚兒骨欲折吾人諳事不復驚以手扣額願天晴
夕陽纔升已復晦積雲如山那肯退

贈吳孟求承議二首

我生仕宦求餬口敢憚水浮兼陸走竭來京口見花落
歸去西風未吹柳山尋北固初知路水飲中冷未盈缶
徒勞結束解書劍未覺塵埃生戶牖瓜洲澄江曉如鏡
照水自覺秋容瘦因公忽致舊酒壺恍如夢覺南柯守
我非初平叱羊口江中浪作羣羊走金山五日厭僧粥
揮榜瓜洲纜古柳晨興但怪妻孥喜故人致饋羅盤缶
起傾殘榼得餘漉洗醖再酌開蓬牖風雲慘淡秋已嚴

桑榆搖落山初瘦軍厨醇味尚煩公應記踈慵窮太守

秋蔬

荒園秋露瘦韭葉色茂春菰甘勝蔗人言佛見為下箸

原注俗言八月韭佛開口

芼炙烹羹更滋滑其餘鎖屑皆可口蕪菁

脆肥薑薤辣藏鞭離筍纖玉露映葉乳茹濃黛抹已殘

枸杞只留枿晚種萵苣初生甲南來食肉忘肉味久思

吾土牛羊茁軟炊一飽老有味痛飲百壺今不說蒲團齋

罷欠伸時自覺少年心解脫

瓜洲謝李德載寄蜂兒木瓜筆

瓜洲蕭索秋江渚西風江岸殘紅舞
津亭永夜守青燈
客睡朦朧聽江雨青罇曉酌遣懷抱
但恨鬱鬱將誰語
敲門忽得故人書洗手開緘見眉宇
蜂兒肥膩愈風痺
木瓜甘酸輕病股銛鋒皓管見還愧
老去筆硯生塵土
北歸飄泊亦何事篙工已束橫江舫
天寒應客太昊墟
當遣何人具雞黍

贈晁二

原注走筆約无咎同赴大尹龍圖四丈羔酒之集

昔者與兄城南鄰未省一日不相親誰令畝舍得恣潤
此事我每懷古人逾旬寒熱不可說遍體戢戢生赤鱗
是身非有病亦幻調御未伏猶酸辛布衾蒙頭但欲睡
瞥見簷雪如飛塵豈無杯杓與酬酢口舌未肯親芳醇
平生相逢百不問斗酒倒盡纔逡巡崎嶇行世得皆妄
鬼我就醉事最真殘年崢嶸欲無日晴雲浩蕩已有春
柳黃梅破最佳絕京兆羔酒仍慙慙

和定州端明雪浪齋

中山士馬如雲屯號令惟覺將軍尊熊旂犀甲羅左右
金鉦鳴鼓喧朝昏少年畎畝老為將誰能復記躬耕村
東坡先生事業異道岐不得安脩門眼前富貴念不起
惟有山林勞夢魂榛中奇石安至此坐蒙湔洗見本根
奔流激浪勢萬里至畫乃掃筆墨痕黃牛三峽固細事
赤壁長江何足論能令萬古蛟蜃怪么麼入此玻璃盆
扁舟獨往則不可平生致君言具存

柯山集卷十二

欽定四庫全書

集部

柯山集卷十三至
七

詳校官庶吉士臣汪彥博

檢討臣何思鈞覆勘

總校官進士臣程嘉謨

校對官學錄臣常循

謄錄監生臣高憲曾

欽定四庫全書

柯山集卷十三

宋張耒撰

七言古詩

某寒熱依枕已數日忽聞車騎明當接頓睡中得
韻語數句上呈四丈龍圖兼記至日之飲

山羊卷酥如切玉翦毛胡羊花作肉燭前醉客淋漓時
山泉更者如珠粟深泥三尺歸不記日到牀前初睡足

爾來七日戰寒熱朝飯齋糜不盈掬客來但辨君且去
卧聽涓涓雪消屋因山事嚴京兆出十驛人人如在目
駝裘便面行野時晴郊已動陳根綠

贈晁十七

應之風骨世絕倫濯濯芳柳當青春瓊瑤冰雪照一坐
我恐子是神仙人十年聲名望不見一日邂逅情相親
安仁白璧絕瑕玷宗之玉樹無埃塵襟清胃明遇事敏
西河舊政傳諸民縣門高開吏束手訟至立決如有神

別君還家恍如失咫尺莫見徒為隣會期殘春再携手
滿引大醕無辭頻

聽客話澶淵事

憶昔兵來動河朔渡河飲馬吹邊角澶淵城下冰載車
邊風蕭蕭千里餘城上黃旂坐真主夜遣六丁張猛弩
雷驚電發一矢飛橫射渠魁貫車柱旃裘無蹤大漠空
歸來封禪告成功自是乾坤扶聖主可能功業蓋萊公
和晁應之憫農

南風吹麥麥穗好飢兒道上扶其老皇天雨露自有時
爾恨秋成常不早南山壯兒市兵弩百金裝劍黃金縷
夜為盜賊朝受刑甘心不悔知何數為盜操戈足衣食
力田竟歲猶無獲飢寒刑戮死則同攘奪猶能緩朝夕
老農悲嗟淚沾臆幾見良田有荆棘壯夫為盜羸老耕
市人珠玉田家得吏兵操戈恐不銳由來殺人傷正氣
人間萬事莽悠悠我歌此詩聞者愁

止酒贈郡守楊瓌寶

止酒正似塞決河厚積薪芻傳砂礫堅牢不使見蟻漏
一線纔通便奔激莫輕弱箭不穿縞轉眼已驚牛弩射
我今止酒用此法目前逾月無涓滴情鍾我輩獨痛制
慧通則沅那可測懲羹端是合吹蘼用玉無疑初諫漆
脾乾胃燥生未省黃嬈無聊怨岑寂不憂羣飲惱姬翁
但畏獨醒嘲楚客茫然自惻還自笑一身心口相仇敵
何妨二豎即奔忙不廢三嬰更滋澤平生杯杓不掛眼
一飲便須論斗石低心伏老慎勿癡此身何啻千金值

送畢公叔奉詔赴陝西

畢子談鋒不可摧，捷若急電飛霆雷。
老僧宿學不敢較，左右戈戟縱橫排。
文如翻河注浩渺，學有要會窮根荄。
眼看青雲不着腳，決去得邑窮山隈。
漢家封疆際四海，琛賫萬里連翩來。
西河故地獨何事，禮樂舊俗遭狼豺。
包藏隱忍非一日，獸子未可仁心懷。
英雄天子命世主，撫劍震怒風雷迴。
馬如屯雲士如虎，萬車載甲如崔嵬。
豈惟俘斬復境土，誓剖巢穴窮卵胎。
除書命子參漕府。

國有大事須羣才男兒功業在勤苦莫惜沙塞衝塵埃
禦戎舊策子所習冒臆請為將軍開封侯報國在今日
贈行滿舉黃金杯

九月十二日入南山憇一民舍冒雨炙衣久之

石棱如刀不容步上挽垂藤下無路風寒雨滑徒旅愁
捨馬杖藜泥沒屨躋攀顛墜不容髮目眩心寒驚反顧
亦知垂堂有遺戒身仰微官欲誰憇蕭蕭茅屋映絕壁
門外汨汨清泉注解衣就火不能煖旋拾山薪伐溪樹

山翁生未食醯醢脫粟寒蔬度朝暮人間平地固不少
何用崎嶇守磨兔秋聲四起山靄夕壞屋疎籬睡無處
披裘結束相勸歸過盡重雲下山去

八盜

挾弓持矛八人者暮出永寧循白馬袁村飲酒呼主翁
主翁倉皇問以弓朝飯南山民獻斃主人贈刀其姓李
道逢兩夫捕鷹隼脅之以威使從已晚投民居迫之饋
坐有三夫願從事其徒新故十有三驅使兩夫前探伺

謀知小水無徼巡，彎弓長呼蒼市門。傳聲市人恣誘脅，
擾擾坐致幾千人。一盜登牀坐而視，四盜執兵環以衛。
八夫露刃入民居，歛聚金珠致之帥。搜羅抉剔凡八戶，
淫汙婦女累其主。烹羊致酒來紛紛，錢幣滿前隨賜與。
一盜揚聲集市人，我憐市人常苦貧。居民積財尚餘羨，
恣爾攫取舍無嗔。市人聽令喜且舞，肩負囊擔誰復數。
須臾散去閭里空，犬逝雞逃無敢語。八盜連謀詔其五，
為我鳴金南取路。人聞金聲謂盜南，八盜西馳下山去。

長吏飛書呵有司坐欲捕獲如吾期洛陽大勝如匹帛
一百萬錢賞能獲一朝兩卒扣吾門自言有密人不聞
我知小鼠羣偷地二盜今居洛之涖立呼吏兵給戈弩
期以朝擒夜馳去可憐鼠子不知逃猶復持矛起相拒
一士揮刀身首離復取傍盜如携兒八夫獲二亡其六
盡取黨人付諸獄

淮陰阻雨

檣竿日日春風轉渺渺孤舟數家縣朝來雨暗隔淮村

白浪卷沙吹斷岸渡頭楊柳濕青青橋下涓涓野水生
滿尺白魚初受釣斷行歸雁故能鳴平生行止任遲速
蓬底欠伸朝睡足從來江海有前約老去塵埃無可欲
曉天暖日生波光桃杏家家半出牆春日春波好相待
短帆輕艣可須忙

蕭朝散惠石本韓幹馬圖馬亡後足

世人怪韓生畫馬身苦肥幹寧忍不畫驥骨當時廐馬
君未知開元太平國無事戰馬卷甲飽不騎玉關索駝

通萬里長安第宅連諸姨笙歌錦繡遍一國六龍長閒
空食粟霜甜秋草沙苑遊日暖春波渭川浴雕圓腰穩
目生光細尾豐膺毛帖肉珠鞍玉鐙驕不行豈有塵埃
侵四足韓生丹青寫天厩磊落萬龍無一瘦豈知車下
骨如牆飢食草根刺傷口君家古圖纔半身千里騰驤
已有神迴身側顧不無意剪髮絡頭嗟失真君不見太
宗戰馬拳腹毛身騎此馬縛羣豪龍虎精神金鼓氣豈
有閑地供脂膏至今畫圖快胃臆想見虬鬚親破賊那

知但愛廐中肥
漁陽筋腳蹄如石
神駒入水隨烟雲
蜀山石路無行人
六驥悲鳴足流血
騎驪遺事一酸辛

次韻君復七兄見贈

老知山林等朝市
扁舟誰能問行止
長淮十日浪吹沙
春風正攪驪龍睡
幽人軟語破永日
衝泥携手林間寺
坐中知兄病當已
眉宇氤氲有佳氣
華池神酒不用醒
人生和暢自忘形
扶持陰德鬼神在
洗除世緣煩惱輕
東來自慚雙鬢改
相逢獨覺兩眼明
論詩尚愛淡生活

學道久歎閒名聲嗟我塵埃費昏旦補削自憐聞道晚

還丹欲問僕僕仙

原注謂陸先生僕僕古仙人也

一菴更伴騰騰睡

原注

謂圓明騰騰古禪宿

春陰夜薄月朦朧劇談燭盡樽亦空他日重

逢龐處士可能猶與世人同

原注兄斷愛屏欲專意禪悅故比應公

離泗州有作

舸舫大扁來何州翩翩五兩在船頭淮邊落帆汴口宿
橋下連檣南與北南來北去何時停春水春風相送迎
沙岸飛鷗舊相見短亭楊柳不無情清歌一曲主人酒

主人壽客客舉手明日酒醒船鼓鳴沙邊破堠不知名
行人十里一回首雲邊猶有塔亭亭

汴上觀迎送有感

居人憐客千里來掃堂為客致酒杯夜闌再拜客辭去
尊前美人不成舞陽關八疊倒玉船銷魂此地自年年
船頭斫竿船尾拖南遊江海北長安長亭出城十餘里
柳邊人家飯遊子少年此地幾經過白頭相逢可柰何

奉先寺

荒涼城南奉先寺後宮美人棺葬此角樓相望高起墳
草間栢下多石人秩卑焚骨不作塚青石浮屠當丘隴
家家墳上作享亭朱門相向無人聲樹頭土梟作人語
月黑風悲鬼搖樹宮中養女作子孫年年犢車來作主
廢后陵園官道側家破無人掃陵域官家歲給半千錢
街頭買餅作寒食

送程德儒赴江西

程侯治楚我獨知去時民作嬰兒啼歸來明光見天子

還把一節來江西年來屢下寬大詔赤子未免寒與飢
恩如憂病政如藥知病無藥何由治朝廷法度寄吏手
付授得所乃合宜事如黑白初易睹敢以容悅相蒙欺
此行委寄意不淺列城數十受指揮任官輕外最弊法
省閣無補真何為遙知敏手多暇日不廢樽俎環蛾眉
從君多乞歛州紙歲晏天祿供吟詩

送杜君章守齊州

平生杜公賢弟兄北州人物家法稱兒童服膺今見面

溫潤圭璧清霜冰冑中詩書不見試髣髴欲白論邦刑
用違所長衆不可公猶談笑氣甚平人才之難萬冀一
一士其重九鼎輕典籤不廢吟擁鼻所歎虛席何人登
臨蕃千騎亦不惡聊以餘力蘇疲氓霜清水落魚潑刺
萬甕沸響新醪傾東秦山河太守貴長安歌舞新曲成
正須晝夜快作樂舍人促公歸治行

送劉季孫赴浙東

將軍好書如卻轂文史隨船三萬軸吟詩坐嘯士賈勇

不學虎頭飛食肉念昔先君得佳句歸見兒童詫珠玉
非離存沒偶不死十年遇公拜還哭堂堂山西忠勇後
凜凜典刑在眉目總戎南下聊復爾將帥于今要頗收
戈船水犀士扼虎三江太湖浪翻屋丈夫為將亦不惡
寂寞揚雄老天祿

寒夜擁爐有懷淮上

長安暮冬雪如山堅冰錯落于其間八荒一雲同慘淡
北海怒迴江海翻老人此時不復出閉戶燃薪守蓬蓽

忽憶去年淮上舟有客致酒頗豪逸三更堂下霜折木
坐上美人鳴寶瑟人生有情亦可憐明眸皓齒如眼前
主人金章作塵土烟飛星散江南天知非遽公時一歎
讀書梅叟並蕭然百年萬事費排遣軟語須問東家禪
同魯直无咎遊啟聖

西方金仙千歲身天上伐木役天人閻浮檀光照世界
作此無量勝妙因九龍寶地赤精宅湧出宮殿壓風輪
化人南來為守護震動六種走鬼神錦幪老人常住世

燕坐說法無冬春故人蕭公作塵土白蓮花葉光如新
妙道無邊世眼窄真心遍通人智貧可憐端居樊宇宙
幾見疑惑談偽真簷牙森森鐵鳳啄殿顏眈眈金獸蹲
官冷何妨近香火時容絕勝洗埃塵

送邵郎中守同州

君不見漢家左輔百萬戶里胥夜驚厭桴鼓爾來荊棘
露沾衣只有山河閱今古邵侯風流華省郎三千憑熊
兩開府不須閉閣決田訟多屑石餅羞魚俎東南文章

舊人物莫媿尊羹便酪乳仍煩細閱白沙龍驤驕一骨
今何所

王都尉惠詩求和逾年不報王屢來索而王許酒
未送因次其韻以督之

酸寒杜陵老痛飲遺身世雲安小縣麴米春遙知美味
無多子猶令此老氣如虎傲兀幾以醉為異爭知侯家
美酒如江湖金鎗犀杓與之俱玉壺曉傾春水決銀槽
夜滴秋雨疎生人文章足賓客許致麴生來坐側三杯

脫帽我家風渴如旱田占雨虹冷官如瓶君未見腹惟
貯水水生面鳴鞭走送煩騶轡坐對朝寒北風起未欲
煩公大作燕老夫自斟看深淺

架蒲萄

蒲萄盤屈如修蛇春來蟄起紆橫斜延之升架鱗甲動
舊枿粲粲生光華盤堆馬乳未敢望殷勤灌溉意非他
要聽暑雨鳴大葉牕間致榻圍青紗年來幽淡亦有趣
自值花草占萌牙奔波玄德老不遂正爾種菜豈不佳

猶嫌尚遣兒輩覺方食失匕徒驚嗟

叙十五日事

五更聞鐘自驚起坐守殘燈具冠履昏昏睡眼正團花
獨愛當庭月如水強驅睡味誰不仁漠漠黑甜留兩背
忽驚左掖漲風埃已起上閣鏘環佩平明原廟煥金碧
飢投散幕走寒餌紛紛僕僕酸兩脰肉食當然賤何事
走馬回家百不問掃榻伸腰真有味起來炊熟日亭午
槐葉新成庭覆翠翻書弄翰老自笑飽食安眠計難遂

古來高士不入城肯聽鷄鳴踏朝市

淮陰太寧山主崇岳逮與子諸父遊今年七十餘
耳目聰明筋力強壯奉戒精苦禪誦不輟聞予自
黃歸欣然空所居而相延日與之語或寂然相對
終日使人之意消也因賦此詩

我來之初季春月門外李花如積雪杜門燕坐度長夏
庭樹秋風忽騷屑西馳大火不復燎急雨淒風爭應節
紫貂暴日知有待畫扇依牆將怨別蒸雲積潦漸收拾

惡木煩蕪稍摧折不知此事誰主張躍馬奔車忽回轍
嗟予行世蹈坎塙僅免豺狼膏齒舌三年閉戶餓江島
脫粟無餘衣百結近者皇天忽悔禍雨施雲行咸澤雪
復官還職遍海內爭脫囚冠鳴佩袂老夫龍鍾衆人後
一舸循江信沿涉風波歷盡見故鄉親友相逢驚白髮
道人已老見我喜靜掃高堂容憇歇佛龕日近得香火
僧飯時容供粗糲讀書小技漫勤苦安禪大觀無分別
久便閑放輕祿利已脫憂危傲縲紲天時進退古不忒

人事興衰今屢閱酒濃村店足斟酌魚美長淮恣哺啜
從今萬事付天工致安民庶看夔契

聞子瞻嶺外歸贈邠老

今晨風日何佳哉南極老人度嶺來此翁身如白玉樹
已過千百大火聚望天留之付真主世間毒烈計已悞
柯山潘子應鼓舞與子異時從杖屨

次韻蘇公武昌西山

靈均不醉楚人醅秋蘭靡蕪堂下栽九江仙人棄家去

吳市不知身姓梅東坡先生送二子一丘便欲藏崔嵬
脫遺簪笏玩杖屨招揖魚鳥營池臺西山寂寥舊風月
百年石樽埋古埃洗樽致酒招浪士荒墳空餘黃土堆
但傳言語古味在一勺酒藏山壘鄧公歎息為摩撫
重刻文字蒼崖隈五年見盡江上客兩屐踏遍空山苔
謝公富貴知不免醉眼來為蒼生開長虹一吐誰得掩
六翮故在何人摧橫翔相與顧鴻雁寶劍再合張與雷
山猿澗鳥汝勿怨天遣兩公聊一來豈如屈賈終不遇

詩賦長遣後人哀

宿譙東逆旅夜聞歌白公琵琶行

元和才子悲流落一聽琵琶謂天樂青衫裊淚作長歌
誰取篇章和宮角譙東夜久行人稀卧聞此歌歌者誰
歌侶舊時人不見舉頭欲聽淚雙垂畫堂青瑣春無事
幾聽此歌還幾醉東風桃李作黃埃寶篋塵昏譜間字
一聲一聽一情傷未老應知幾斷腸展轉曲終燈燼落
荒城寒月夜飛霜

趙德麟有詩言過萬壽縣得玉芝乃以供一醉之
味按道書凡芝皆神仙上藥無乃輕用之乎

王孫憔悴食無肉天遣枯腸出雙玉荒園夜飲供一醉
仙物無乃遭輕辱王孫高名滿天下剗膾龍蛟刀几熟
眼高不為小物變采掇僅同葵薤屬憐君十年清潁客
年少未甘窺藥錄再逢靈藥慎勿輕不死問君安可獨

東園

堂中宴坐不妄出堂外青春去如失小園十步綠如雲

一時桃李事已畢，猶有荼蘼數朵在。
未覺塵沙汙玉質，金沙格俗終可憐。
膩白嬌紅如欲滴，老夫睡起聽山禽。
竹間林外紛嘲嘯，筍生漸愜子猷願。
梅熟未邀朱老喫，翻書只作隨睡具。
傾壺屢進忘憂物，今春風雨稍依節。
上田麥穗過數尺，但知洗眼看世塗。
莫厭終身守蓬蓽。

送翟公巽赴中書舍人

韓筋柳骨世不聞，翟公筆力回千鈞。
十年聲名滿四海，淮陽邂逅雙朱輪。
老翁空踈亦何有，察公于我意甚真。

高談疊疊雲漢上一掃闢葦如灰塵夜光明月不計數
坐使衰弊生精神恨無金玉相報答還家三嘆嗟我貧
青燈論文夜未分曉聞門外送使君問君舍此去安往
紫皇詔歸侍玉宸鋒鋌發硎斷犀象好為明主裁絲綸
論思獻納乃其職况公之意常在民追還三代舊風采
主以事實致此文聖君賢相有美意筆端與物為陽春
波稜乃自波陵國來蓋西域疏也甚能解麪毒予
頗嗜之因考本草為作此篇

誰從西域移佳蔬遍植中原葵莧俱清霜嚴雪凍不死
寒氣愈盛方芳敷貫金銳箭脫秋竹剪羅巧帶飄華裾
中含金氣抱勁利穿滌炎熱清煩紆老人食貧貪得得
大釜日煮和甘腴飯炊香白煮餅滑一飽盡鉢無贏餘
空厨蕭條烟火冷可但食客歌無魚男兒五鼎食固美
當念就鑊還愁吁

北鄰賣餅兒每五鼓未旦即遶街呼賣雖大寒烈
風不廢而時略不少差也因為作詩且有所警示

柜結

城頭月落霜如雪樓頭五更聲欲絕捧盤出戶歌一聲
市樓東西人未行北風吹衣射我餅不憂衣單憂餅冷
業無高卑志當堅男兒有求安得閒

寄余五十五

憶昨戊午寄東都人事紛紛相見疏補官洛陽我西走
君理舟楫歸江湖往來相失頃刻爾坐使一別三年餘
他鄉滿眼非故舊南北耿耿無音書福昌古邦廢已久

莽莽榛棘藏麕兔空宮蕭條唐舊路古堞斷續韓遺墟
商頑餘民俗未泯習尚兇獷羞為儒高堂塵埃坐無客
雖復強接非歡愉嗟君尚復記憶我兩得書札何勤劬
最後新詩意不淺知君過我山陽居人間翩翩輕薄子
交友暫爾久則渝歡欣憂患心不易我視一世無君如
念昔登科各年少君中第一名傳呼春風朝遊踏廣陌
夜雨縱飲傾金壺當時意氣今在否十年我困官庭趨
君宜騰達上寥廓何乃失足遭崎嶇人生難必但如此

付委造物隨所驅得之幾何失未損七尺可貴惟吾軀
洛川春風來已久桃李次第爭芬敷登臨想君不可見
夢逐流水遊東吳東吳舊遊我所樂飲有美酒烹有魚
何當相逢兩披豁擺落萬累無嗟吁

柯山集卷十三